

雷公炮製藥性解

卷五

木部

白茯苓。味淡微甘。性平無毒。入肺脾小腸三經。主補脾氣。利小便。止煩渴。定驚悸。久服延年。去皮心研細。入水中攪之。浮者是其筋也。宜去之。誤服損目。赤者專主利水。抱根而生者名茯神。主補心安神。除驚悸。治健忘。馬蘭爲使。惡白蘞。畏牡蒙。地榆。雄黃。秦艽。龜甲。忌醋及酸物。

按茯苓色白。是西方肺金之象也。味淡。是太陽滲利之品也。微甘。是中央脾土之味也。故均入之。夫脾最惡溼。而小便利則溼自除。所以補脾。既能滲洩燥脾。

明 雲間 李中梓士材編輯
清 吳門 王子接晉三重訂

鄞縣 曹赤電炳章校點

似不能生津已。潔古何爲稱其止渴。夏由色白屬金。能培肺部。肺金得補。則自能生水。且經曰。膀胱者州都之官。津液藏焉。氣化則能出矣。誠以其上連於肺。得肺氣以化之。津液從之出爾。藥性所謂白者入壬癸。亦此意也。而渴有不止者乎。至於驚悸者。心經之虛也。而心與小腸相爲表裏。既瀉小腸。而心火亦爲之清矣。故能定之。丹溪曰。陰虛未爲相宜。蓋虞其滲洩爾。然味尙甘。甘主緩。亦無大害。非若豬苓一於淡滲。而大傷陰分也。藥性云。小便多而能止。大便結而能通。與本功相反。未可輕信。赤者屬丙丁。專入膀胱瀉火。故利水之外無他長。茯神抱根。有依而附之之義。驚悸者魂不能附。健忘者神不能守。宜其治矣。廣誌云。茯神松脂所作。勝茯苓。衍義曰。氣盛者洩於身。不抱本根。結爲茯苓。有津氣而不甚盛。不離其本。結爲茯神。考茲兩書。各相違悖。然仙經服食。多需茯苓。而茯神不與焉。兩說之是非。於是乎辨。

琥珀味甘。性平。無毒。入心脾小腸三經。主辟百邪。安五臟。定魂魄。止心痛。消瘀血。利水道。通五淋。破癥結。去目翳。傅金瘡。

按琥珀乃松脂入地千載化成。得土既久。宜入脾家。松之有脂。猶人之有血與

水也。且成珀者。有下注之義。又宜入心與小腸。內經曰。主不明則十二官危。使道閉塞而不通。服琥珀則神室得令。五臟安。魂魄定。邪何所附。病何自生邪。於是使道通。而瘀血諸證靡弗去矣。夫目得血而能視。心寧則榮和。而翳何足虞。金瘡者。惟患其血逆於腠爾。能止之和之。未有不瘳者也。丹溪曰。古方用以燥脾土有功。脾能運化。則肺氣下降。故小便可通。若血少不利者。反致其燥急之苦。別說云。茯苓生成於陰者也。琥珀生於陽而成於陰者也。故皆主安心利水而治榮。

雷公云。凡使紅松脂。石珀。水珀。花珀。物象珀。翳珀。琥珀。紅松脂如琥珀。只是大脆文橫。水珀多無紅色。如淺黃多粗皮。皴石珀如石重。色黃不堪用。花珀文似新馬尾。松心文一路赤。一路黃。物象珀其內似有物。極爲神妙。翳珀爲衆珀之長。故號曰翳珀。琥珀如血色。安於布上拭。吸得芥子者真也。凡入藥中。用水調側柏子末。安於瓷鍋中。安琥珀於末中了。下火煮。從巳至申。別有異光。便搗如粉。重篩用。

松香。味苦甘。性溫無毒。入脾肺二經。主安五臟。除伏熱。解消渴。逐諸風。療癰疽惡

瘡。及白禿。疥癬風氣。金傷止血。殺蟲定痛。松子。益氣補虛。松花。清心解煩。松葉。生毛髮。去風溼。灸罽凍瘡。松節。主骨節久風。脚痺疼痛。久服俱能辟穀延年。

按松香甘溫之品。與脾部相宜。而肺者脾之子也。故兩入之。伏熱等證。悉屬二經。烏得不治。子花節葉。主療小異。亦親上親下之道也。

柏子仁。味甘辛。性平無毒。入肺脾腎三經。主安五臟。定驚悸。補中氣。除風溼。興陽道。煖腰膝。去頭風。辟百邪。潤皮膚。明耳目。側柏葉。味苦澀。性微寒。止吐衄崩痢。除風冷溼痺。烏鬚黑髮。灸罽凍瘡。久服延年。牡蠣。桂。瓜子。爲使。畏菊花。羊蹄草。諸石及麵麴。

按柏子仁辛歸肺。甘歸脾。濁陰歸腎。故均入之。柏葉之苦澀。屬金而善守。最清血分。爲補陰要藥。須用嫩葉。春採東。夏採南。秋採西。冬採北。纔得節候生氣。雷公云。凡使先以酒浸一宿。至明。漉曬乾。用黃精自然汁。日中煎。手不住攪。若夫天陰。卽於當中著火。用瓶器盛柏子仁。著火。緩緩煮。成煎爲度。每煎三兩柏子仁。用酒五兩浸。乾爲度。

桂。味辛甘。性大熱有毒。其在表最厚者。曰肉桂。去其麤皮。爲桂心。入心脾肺腎四

經。主九種心疼。補勞傷。通九竅。煖水臟。續筋骨。殺三蟲。散結氣。破瘀血。下胎衣。除欬逆。療腹痛。止瀉痢。善發汗。其在中次厚者。曰官桂。入肝脾二經。主上焦有寒。走肩臂而行枝節。其在嫩枝四發者。曰桂枝。專入肺經。主解肌發表。理有汗之傷寒。官者皆殺草木毒。百藥無畏。性忌生葱。

按桂在下。有入腎之理。屬火。有入心之義。而辛散之性。與肺部相投。甘溫之性。與脾家相悅。故均入焉。官桂在中。而肝脾皆在中之臟也。且經曰。肝欲散。急食辛以散之。以辛補之。又曰。脾欲緩。急食甘以緩之。以甘補之。桂味辛甘。二經之所由入也。薄桂在上。而肺胃亦居上。故宜入之。桂枝四發。有發散之義。且氣味俱輕。宜入太陰。而主表。丹溪曰。仲景救表用桂枝。非表有虛。而用以補也。衛有風寒。故病自汗。以此發其邪。則衛和而表密。汗自止爾。衍義乃謂仲景治表虛。誤也。本草言桂發汗。正合素問辛甘發散之義。後人用桂止汗。失經旨矣。大抵桂爲陽中之陽。壯年火旺者忌食。惟命門火衰不能生土。納穀不化。及產後虛弱者。宜之。細考桂有數種。論之者無慮數十家。或言種異。或言地殊。各不相侔。咸無所據。詢之交廣商人所販。惟陳藏器所謂雖分數等。同是一物。此說最當。

別說亦稱之矣。今採其意以詳別如右。

雷公云。凡使其薄者要紫色。厚者去上粗皮取心。生味辛者。使每斤大厚紫桂。只取得五兩。取有味厚處生用。如未用。即用重裹熟絹。并紙裹。勿令犯風。其州上只有桂草。無桂心。用桂草煮向陽木皮。遂成桂心。凡使即單搗用。

槐實味苦。酸鹹。性寒無毒。入心肝大腸三經。主五內邪熱。腸風五痔。湯火傷瘡。男子囊墜腫痛。陰瘡溼證。婦人陰中痛癢。崩中漏下。明目補腦。殺蟲去風。黑髮延年。酒服能催生墮胎。枝專主洗溼熱諸瘡。治九種心疼。皮主中風拘攣。齒痛疳蠱。消癰解毒。止痛長肉。膠主肝臟風。筋脈抽掣。及急風口噤。四肢不收。或毒風周身如蟲行。破傷危急。花與實同功。又主心痛及疔腫熱毒。赤白下痢。小兒驚癇。景天爲使。

按槐實之苦。能泄心火。酸寒之性。能伐肝經。經曰。酸苦涌洩爲陰。其功主降。故又入大腸。以理下焦諸證。且催產難。夫蟲之生也。因於溼。風之生也。因於熱。溼熱既去。又奚庸虞。花枝皮葉。主治大同小異。久爲痔瘡要藥。木香味苦辛。性微溫無毒。入心肺肝脾胃膀胱六經。主心腹一切氣疾。痲痺癰塊。

九種心疼。止瀉痢。除霍亂。健脾胃。消食積。定嘔逆。下痰壅。辟邪氣。瘟疫。殺瘧蟲。精物。宜生磨用。火炒。令人脹。形如枯骨。苦口。沾牙者良。

按木香辛入肺。苦入心。溫宜脾胃。肝者心之母也。膀胱者肺所連也。故均入焉。蓋心乃一身之主。氣血之所聽命者也。有主則能塞氣。肺氣調則金能制木。而肝火自伏矣。凡人有怒。則肝氣拂逆。而反忤其元氣。心有縱肝之情。而不能制。則肝氣於是乎盛。或爲拂逆。或爲氣衝。得木香則心氣暢而正氣亦暢。肝氣何拂逆之有哉。實心之行。夫肝也。非肝之自行也。東垣以黃連制之。惡其氣行過於通暢。不無走泄之患爾。

雷公云。凡使其木香是蘆葦根條。互盤旋。採得二十九日。方硬如朽骨。硬碎。其有蘆頭丁。蓋子色青者。是木香神也。

山梔味苦。性寒無毒。入心肺大小腸胃膀胱六經。主五內邪熱。亡血津枯。面紅目赤。癰腫瘡瘍。五種黃病。開鬱瀉火。療心中懊懣。顛倒而不眠。治臍下血滯。小便而不利。皮走肌膚之熱。仁去心胸之熱。解羊躑躅及蠱蟲毒。

按山梔味苦歸心。輕飄象肺。大腸則供肺爲傳道者也。小腸則受盛與心應者。

也。胃亦上焦之腑也。膀胱亦肺部之約也。故咸入之。以理邪熱諸證。潔古曰。輕清上行。丹溪又曰。屈曲下行。兩家之說。似相左矣。不知惟其上行。最能清肺。肺氣清而化。則小便從此氣化而出。經曰。膀胱藏津液。氣化則能出者是也。虛火炎者。炒黑用。煩鬱嘔逆者。薑汁炒用。此外並宜生服。

雷公云。凡使勿用顆大者。號曰伏。凡梔子無力。須要如雀腦并鬚長有九路。赤色者上。凡使先去皮鬚取仁。以甘草水浸一宿。漉出焙乾。搗篩如金末用。

吳茱萸。味苦辛。性熱有小毒。入肝脾胃大腸腎五經。主下氣消痰。寒氣噎塞。心腹刺痛。霍亂轉筋。脚氣攻心。止咳逆。逐風邪。消宿食。除血痺。鹽湯炮去毒用。寥實爲使。惡丹參。硝石。白堊。畏紫石英。

按吳茱萸辛熱之劑。宜入五經。以理寒證。多食大損元氣。腸虛者忌之。

雷公云。凡使先去葉梗。并雜收子。用大盆一口。使鹽水洗一百轉。自然無涎。日乾。任入丸散中用。修事十兩。用鹽二兩。研作末。投東流水。四杓中分作一百度洗。則有大效。若用醋煮。卽先沸醋三十餘沸後。共茱萸沸。醋盡曬乾。每用十兩。使醋鎔爲度。

山茱萸味甘酸。微溫無毒。入肝腎二經。主通邪氣。逐風痺。破癥結。通九竅。除鼻塞。療耳聾。殺三蟲。安五臟。壯元陽。固精髓。利小便。去梗用。寥實爲使。惡桔梗。防風。防己。

按山茱萸大補精血。故入少陰厥陰。六味丸用之。取其補腎而不傷於熱耳。若舍是而別求熱劑。以爲淫慾助。猶棄賢良而搜佞倖也。愚乎哉。

雷公云。凡使勿用雀兒蘇。臭似山茱萸。只是核八稜。不入藥。使山茱萸須去內核。每修事去核子一斤。取肉皮用。只存成四兩已來。緩火熬之。方用。能壯元氣。精秘。其核最滑精。

蔓荊子味苦甘辛。性微寒無毒。入肝經。主散風寒。療頭風。除目痛。去翳膜。堅齒牙。利九竅。殺百蟲。酒浸一宿蒸用。惡石膏。烏頭。

按經曰。東方青色。入通於肝。開竅於目。又曰。風生木。木生酸。酸生肝。荊實入肝。故專主散風。以療目疾。主治秘訣云。其味苦甘。爲陽中之陰。能涼諸經之血熱。杜仲味辛甘。性溫無毒。入腎經。主陰下溼癢。小便餘瀝。強志。壯筋骨。滋腎。止腰痛。去粗皮。酥蜜炙去絲用。惡蛇蛻。玄參。

按杜仲降而屬陽。宜職腎家之證。然精血燥者。不宜多用。

雷公云。凡使先須削去粗皮。用酥蜜和作一兩炙之。以盡爲度。炙乾了。細剉用。

凡修事一斤。酥一兩。蜜三兩。二味相和合一處用。

烏藥味苦辛。性溫無毒。入肺脾二經。主一切氣證。及中惡心腹痛。蠱毒鬼疰。天行

疫瘴。嘔逆脹滿。霍亂吐瀉。癰癤疥癩。

按烏藥。辛宜於肺。溫宜於脾。故主中惡等證。癰癤疥癩。成於血逆。始於氣逆。烏

藥長於理氣。故并療之。然辛溫發散。不宜久用。恐損真元。

厚朴味苦辛。性溫無毒。入脾胃二經。去實滿而治腹脹。除溼結而和胃氣。止嘔清

痰。溫中消食。乾薑爲使。惡澤瀉。寒水石。硝石。忌食豆。

按厚朴辛則能發。溫則能行。脾胃之所喜也。故入之以理諸證。丹溪曰。厚朴屬

土而有火。平胃散用之以佐蒼朮。正謂瀉上焦之溼。平胃土不使太過。以致於

和而已。若以爲溫補而泛用之。非也。體重濁而微降。最能耗氣。春夏秋宜用。冬

間忌之。氣虛之人及孕婦。亦不可服。

雷公云。凡使要用紫色味辛爲好。或丸散。便去粗皮。用醋炙過。每條一斤。用酥

四兩。多了細剉。若用湯飲下。使用自然薑汁入兩。炙一日爲度。

黃柏。味苦。性寒無毒。入腎膀胱二經。主瀉下焦隱伏之火。安上焦虛噦之蟲。除臍下痛。補腎水衰。止血痢。治癰瘡。明眼目。利小便。除溼熱。療女子熱崩。鹽酒多炒。免致寒入於腎。惡乾漆。肉厚鮮黃者佳。

按黃柏沈而屬陰。故主腎與膀胱諸證。其性苦寒。能泄亢甚之陽。以堅腎部。則水主既盛。陽光自遏。而陰血無火爍之患矣。豈真有滋補之功哉。若腎家無火。兩尺微弱。或左尺獨旺者。均不宜用。

桑白皮。味辛甘。性寒無毒。入脾肺二經。主傷寒羸瘦。崩中脈絕。肺氣有餘。虛勞客熱。瘀血停留。吐血熱渴。止嗽消痰。開胃進食。利二便。消水腫。能殺寸白。可縫金瘡。皮中白汁。塗脣燥及小兒口瘡。銅刀切片。文火蜜炙。勿令涎落。桂心麻子爲使。忌見鉛鐵。桑枝。療手足拘攣。陰管作痛。眼眶作暈。氣逆咳嗽。腫毒風癢。桑椹。開關竅。利血脈。安神魂。黑鬚髮。明耳目。桑寄生。主除腰痛。去風溼。健筋骨。充肌膚。愈金瘡。益血脈。長鬚髮。堅齒牙。安胎氣。下乳汁。止崩漏。折其莖。深黃色者真。

按桑皮辛則走西方而瀉肺金。甘則歸中央而利脾土。然肺氣虛脾氣弱者。不

宜用之。恐潤利之品。能走真元爾。枝本四發。有發散之義。樞爲桑英。有裨益之功。而寄生獨產於海外。蓋以地煖不蠶。桑木無採掇之苦。得氣最厚。生意濃密。葉上自然生出。何曾有所爲節間。可容樹子也。此說本之丹溪。最爲近理。圖經諸書。胥失之也。難得其真。誤服殺人。用者謹之。

雷公云。凡使在樹上自然生獨枝樹是也。採得後。用銅刀和枝根莖細剉。陰乾任用。勿令見火。切忌切忌。

枸杞子。味苦甘。性微寒無毒。入肝腎二經。主五內邪熱。煩躁消渴。周痺風溼。下胸脇氣。除頭痛。明眼目。補勞傷。堅筋骨。益精髓。壯心氣。強陰益智。去皮膚骨節間風。散瘡腫熱毒。久服延年。惡乳酪。解麪毒。

按枸杞子味苦可以堅腎。性寒可以清肝。五內等證。孰不本於二經。宜其治矣。陶隱居云。去家千里。勿食枸杞。此言其補精強腎也。然惟甘州者有其功。至於土產者味苦。但能利大小腸。清心除熱而已。

雷公云。凡使用採得後。使東流水浸。以物刷去土。用熟甘草湯浸一宿。然後焙乾用。其根若似物形狀者佳。春食葉。夏食子。秋冬食根并子也。

地骨皮。味苦。性寒無毒。入肺腎二經。療在表無定之風邪。退傳屍有汗之骨蒸。除熱清肺。止嗽解渴。涼血涼骨。利二便。去骨用。

按地骨皮卽枸杞根也。故均入腎。又入肺者。蓋以其爲表則其用在表。肺主皮毛。所以入二經。功用與枸杞相同。

酸棗仁。味酸。性平無毒。入心脾肝膽四經。主筋骨酸痛。夜臥不寧。虛汗煩渴。安和五臟。大補心脾。炒熟去皮尖研用。生者治嗜臥不休。惡防己。

按棗仁味酸。本入肝經。而心則其所生者也。脾則其所制者也。膽又其相依之腑也。宜並入之。聖惠方云。膽虛不眠。寒也。炒熟爲末。竹葉湯調服。蓋以肝膽相爲表裏。血虛則肝虛。肝虛則膽亦虛。得熟棗仁之酸溫。以旺肝氣。則木來尅土。脾主四肢。又主困倦。所以令人多睡。又濟衆方云。膽實多睡。熱也。生研爲末。薑茶湯調服。亦以棗仁秋成者也。生則得全金氣。而能制肝木。肝木有制。則脾不受侮。而運行不睡矣。

雷公云。凡使採得後。曬乾取葉。重拌酸棗仁。蒸半日。去尖皮了。任研用。益智。味辛。性溫無毒。入脾胃腎三經。主遺精虛漏。小便餘瀝。益氣安神。和中止嘔。

去皮鹽炒用。

按益智辛溫。善逐脾胃之寒邪。而土得所勝。則腎水無相尅之虞矣。遺精諸證。吾知免矣。

檳榔。味辛甘澀。性溫無毒。入胃大腸二經。主消穀逐水。宣臟利腑。攻堅行滯。除痰癖。殺三蟲。却伏尸。療寸白。攻脚氣。解諸蟲。墜藥性如鐵石。治厚重如奔馬。見火無功。

按檳榔甘溫之品。宜於胃家。沉陰之性。宜於大腸。考諸功驗。取其下墜。非取其破氣。廣閩多服之者。蓋以地煖溼蒸。居民感之。氣亦上盛。故服此以降之。爾尖長者。快銳速效。

雷公云。凡使存坐穩正。堅實不虛者。碎破肉有錦紋者妙。半白半黑。并心虛者。不入藥用。凡修事。卽頭圓矮扁者爲榔。身形尖紫文者爲檳。榔力小。檳力大。欲使先以刀刮去底。細切。勿經火。

大腹皮。味苦辛。性微溫無毒。入肺脾二經。主冷熱氣攻心腹。疏通關格。除脹滿。祛壅滯。消浮腫。酒洗去沙。復以大豆汁洗用。

按大腹辛宜瀉肺。溫宜健脾。然宣泄太過。氣虛者勿用。樹上多棲鳩鳥。污染糞毒。最能爲害。故必多洗。方堪用爾。

丁香。味甘辛。性溫無毒。入肺脾胃腎四經。主寒氣腹痛。霍亂反胃。鬼疰蟲毒。及腎氣奔豚氣。壯陽煖腰膝。療冷氣。殺酒毒。消痰癖。除冷勞。有大如山茱萸者。名母丁香。氣味尤佳。

按丁香辛溫走肺部。甘溫走脾胃。腎者。土所制而金所生也。宜咸入之。果犯寒疴。投之輒應。倘因火症爲禍。勿輕。陳藏器云。拔去白鬚。薑汁調塗孔中。重生卽黑。

雷公云。凡使有雌雄。雄顆小。雌顆大。似棗核。方中多使雌。力大。膏煎中用雄。若用須去了。蓋乳子發人背癰也。

冰片。味辛苦。性溫無毒。入肺肝二經。主心腹邪氣積聚。喉閉乳蛾。舌腫。痔瘡。通九竅。消風氣。明目。殺諸蟲。解蟲毒。又主小兒驚癇。大人痰迷。

按冰片之辛。本入肺家。而肝則受尅者也。故兼入焉。主治諸症。俱是氣閉生熱。而冰片則辛散之極。開氣如反掌。故多用之。然亦從治之法也。世俗因其主用。

遂疑其性寒。輒與麝香同用。以爲桂附之助。獨不計人身陽易於動。陰易於虧。丹溪之訓。詎可忽諸。

猪苓。味淡。性平無毒。入膀胱經。主利便除溼。消腫通淋。去黑皮用。

按猪苓味淡。五臟無歸。專入膀胱利水。今之療瀉者。概用之。謂其去脾家之溼也。不知一於滲泄。逐水太過。水盡則傷腎。昏目不可不知。

雷公云。凡採得用銅刀刮上粗皮一重。薄切。下東流水浸一宿。至明漉出細切。以升麻葉對蒸一日。去升麻葉令淨。曬乾用。

蘇木。味甘鹹。性平無毒。入肝經。主破產後惡血。瘡瘍死症。一切跌撲損傷。調月水。去瘀血。和新血。排膿止痛。消癰散腫。及主霍亂嘔逆。赤白痢下。酒蒸陰乾用。

按蘇木專主血分。宜入肝經。然破血之功多。而和血之功少。勿得多用。以傷陰分。

雷公云。凡使去上粗皮并節子。若有中心文橫如紫角者。號曰水中尊色。其芪倍常百等。須剉細了。重搗拌細條梅枝蒸。從已至申。陰乾用。

沉香。味辛苦。性溫無毒。入腎命門二經。主祛惡氣。定霍亂。補五臟。益精氣。壯元陽。

除冷氣。破癰癰。皮膚瘙癢。骨節不仁。忌見火。生磨用。

按沉香屬陽而性沉。多功於下部。命腎之所由入也。然香劑多燥。未免傷血。必下焦虛寒者宜之。若水臟衰微。相火熾炎者。誤用則水益枯而火益烈。禍無極矣。今多以爲平和之劑。無損於人。輒用以化氣。其不禍人者幾希。

雷公云。沉香。凡使須要不枯者。如嘴角硬。重沉於水下爲上也。半沉者次也。大凡入丸散中用。俟衆藥出。卽入拌和用也。

乳香味辛苦。性溫無毒。入十二經。主祛邪下氣。補腎益精。治霍亂。催產難。定心腹急疼。療癰癰風癢。諸般惡瘡。風水腫毒。中風聾瘵。亦入敷膏。止痛生肌。瓦上微炒出油。燈草同研用。

按乳香辛香發散。於十二經絡無所不入。生南海波斯國赤松脂也。垂滴成珠。綴珠未落者。名珠香。圓小光明。效速。滴下如乳。鎔塌地面者。名塌香。大塊枯黯。效遲。用者不可不審。

沒藥味苦辛。性平無毒。入十二經。主破癰結宿血。止療金瘡杖瘡痔瘡。諸惡腫毒。跌打損傷。目中翳暈。歷節諸風。骨節疼痛。製同乳香。